

Dasar-dasar
Adat Perpatih

OLEH . ABDUL RAHMAN BIN HJ. MOHAMMAD

dasar-dasar adat perpatih

untuk anak2-ku :

- *zarina*
- *zarida*
- *zariati*
- *zaziani*

DASAR-DASAR ADAT PERPATEH

oleh

Abdul Rahman bin Hj. Mohammad



1964

PENERBITAN PUSTAKA ANTARA
KUALA LUMPUR.

BAB XI

RAJA TIADA BERNEGERI

Perbilangan Adat Perpatih mengatakan bahawa:—

“Anak-buah nan Berbuapak
Suku nan Berlembaga,
Luak nan Berpenghulu,
Jika negeri di-beri Beraja”.

Walau pun menurut perbilangan ini sa-tiap negeri itu mesti di-beri ber-Raja, akan tetapi kedudukan sa-saorang raja dalam masyarakat Adat Perpatih itu ada-lah berlainan keadaan-nya dengan kedudukan raja2 dalam negeri2 lain.

Dan sa-perkara lagi, seperti di-Naning dalam Negeri Melaka, walau pun Adat Perpatih maseh tetap di-pegang tegoh di-situ, dengan Luak tersebut tetap mempunyai Datok Penghulu-nya, ia-itu Dato' Naning, namun sejak beratus-ratus tahun lagi negeri itu tiada mempunyai Raja.

Keadaan ini telah berlaku kerana kedudukan Luak Naning itu amat berhampiran dengan Kota Melaka. Sejak tahun 1511 apabila Kota Melaka di-ta'alok oleh orang2 Portugis, kota tersebut sentiasa di-kuasai oleh bangsa2 asing: sa-sudah Portugis Belanda, sa-lepas Belanda Inggeris.

Sa-chara langsung, sejak tahun 1511, Luak Naning tiada-lah lagi mempunyai raja.



Peta Tanah Melayu ini memperlihatkan dacrah Adat Perpateh di-Negeri Sembilan dan Melaka.

Tetapi tiada pula demikian hal-nya di-kalangan orang² Minangkabau yang di-Rembau dan di-Luak² yang lain lagi di-Negeri Sembilan itu, seperti ada di-katakan oleh perbilangan di-bawah ini, yang mengatakan bahawa mereka:—

“Beraja ka-Johor,
bertali ka-Siak,
bertuan ka-Minangkabau”.

Walau pun sejarah tiada dapat membuktikan dengan tepat bahawa semua orang² Minangkabau di-Negeri Sembilan itu benar² ada beraja ka-Johor, tetapi bukti-nya ada diperolehi bahawa orang² Minangkabau itu mempunyai perhubungan dengan Siak dan Minangkabau, kerana kebanyakan orang² Minangkabau yang datang ka-Negeri Sembilan itu dahulu datang dengan melalui Siak.

Dan juga orang² Minangkabau yang di-Rembau telah mengundang sa-orang Raja dari Pagar Ruyong di-Minangkabau untuk menetap di-Negeri Sembilan, dengan Raja itu di-beri kekuasaan penuh dalam Lingkungan yang di-khaskan bagi-nya di-Seri Menanti dalam Daerah Kuala Pilah (yang pada masa dahulu di-kenali sa-bagai Luak Ulu Muar), dengan Raja itu menyandang gelaran Yamtuan (atau Yang di-Pertuan) Seri Menanti.

Maka di-dapati pula perbilangan adat dalam Luak Rembau yang mengatakan bahawasa-nya “Raja itu tiada Bernegeri”.

Sebah-nya Yamtuan itu dulu di-katakan “Raja tiada Bernegeri” ia-lah oleh kerana sa-benar-nya beliau tiada berkuasa ka-atas mana jua Luak dalam Negeri Sembilan yang lama itu, kechuali dalam Lingkungan-nya sahaja, ia-itu Seri Menanti, yang di-khaskan bagi-nya itu.

Semua-nya ini di-sebabkan oleh kerana masing² Luak itu sudah mempunyai pertadbiran dan pemerentahan yang berdaulat di-bawah pimpinan Datok Penghulu atau Undang-nya sendiri.

Boleh jadi juga semua-nya itu di-perpadankan menurut chontoh yang di-jalankan di-Negeri Minangkabau sendiri.

Dahulu di-Negeri Minangkabau itu, walau pun Raja Minangkabau (Yang di-Pertuan) bersemayam di-Pagar Ruyong dan kedudukan-nya di-akui juga oleh semua penduduk Minangkabau, sama ada yang mengikut Adat Temenggong atau yang menganut Adat Perpatch, akan tetapi terhadap pertadbiran dan pemerentahan negeri, terutama di-Luak² yang menganut Adat Perpatch, Raja itu tiada-lah berkuasa sa-penoh-nya. Kerana segala kuasa terserah kepada Penghulu² Luak dengan tampok kekuasaan di-pegang oleh "**Besar Empat Balai**".

Maka demikian juga yang telah berlaku di-Negeri Sembilan, ia-itu apabila Kerajaan British memaksa Luak² yang lain lagi dalam Negeri Sembilan itu mengakui Yamtuan Seri Menanti itu sa-bagai Yamtuan (Yang di-Pertuan Besar) bagi saluroh Negeri Sembilan, maka di-perlembagakan-lah supaya Yamtuan itu memerintah negeri bersama² dengan **Undang Yang Empat**—ia-itu Undang² Sungai Ujong, Jelebu, Johol dan Rembau.

Walau bagaimana pun juga, kekuasaan-nya tetap seperti yang berlaku sejak sediakala, dan kedudukan-nya adalah sa-bagai sa-orang "**Raja tiada Bernegeri**".

Sampai sekarang Yamtuan itu tiada di-belehdan men-champori hal-ehwal dalam Luak² yang di-bawah pimpinan masing² **Undang Yang Empat** itu.

Perlantikan sa-saorang Yang di-Pertuan mesti-lah di-sahkan oleh Undang Yang Empat. Kapada Undang Yang Empat itu-lah terserah kekuasaan penoh sama ada sa-saorang raja di-Seri Menanti itu di-bolehdan atau tidak menjadi Yang di-Pertuan.

Yang di-Pertuan itu juga tiada-lah boleh menyelenggarakan sa-suatu yang rasmi unok Negeri pada hakekat-nya kalau tiada sa-izin Undang Yang Empat itu.

Beberapa Soalan:

- (1) Sejak bila pula Luak Naning itu tiada lagi memakai Raja?
- (2) Bagaimana bunyi perbilangan yang mengatakan bahawa Negeri Sembilan itu di-perintah oleh Raja Johor.
- (3) Siapa-kah yang di-maksudkan Undang Yang Empat itu?
- (4) Kenapa pula Raja di-Negeri Sembilan itu di-sbaratkan seperti "Raja tiada Bernegeri"?
- (5) Kenapa Yamtuan Seri Menanti itu akhir-nya di-jadikan Yamtuan Negeri Sembilan?



Sa-orang Undang Luak dalam suatu upacara lengkap dengan alat kebesaran dan ahli2 lembaga-nya.

PENUTUP

Penyusun ingin mengingatkan bahawa buku ini hanya mencheritakan "Adat Perpatih" itu pada dasar-nya sahaja, kerana perbedzaan2 kechil-kechilan di-sana sini tetap di-dapati dari "Adat Perpatih" yang di-pakai di-Naning dengan yang di-pakai dalam Luak2 Negeri Sembilan dan juga di-Minangkabau; seperti di-katakan oleh pepatah: "Lain padang lain belalang, lain lubok lain ikan". Akan tetapi pada dasar-nya belalang itu belalang juga dan ikan itu ikan juga; dan demikian juga pada dasar-nya "Adat Perpatih" itu ada-lah sama belaka keadaan-nya di-tiap-tiap Luak dan Negeri tersebut.

Berhubung dengan Bab Kesabelas, penyusun meminta ma'af kerana tiada dapat menghurai, membinchang dan mencheritakan kesah "Raja Tiada Bernegeri" itu dengan sa-penoh-nya, kerana ia-nya sa-benar-nya merupakar sejarah Negeri Sembilan, yang sudah tentu akan lebeh sesuai di-binchang dan di-huraikan dalam sa-buah buku sejarah pula.

Di-sini juga penyusun ingin menyatakan bahawa susunan dan kekuasaan pemerentahan seperti telah di-cheritakan itu ada-lah yang telah betul2 di-jalankan di-waktu para penganut "Adat Perpatih" itu telah memerintah negeri2 mereka sendiri.

Kita semua tentu ma'alum bahawa sejak orang2 Minangkabau, Naning dan Negeri Sembilan di-perintah oleh Kuasa2 Penjajah (Belanda dan Inggeris), kuasa2 "Undang", "Lembaga" dan "Buapak" itu sudah banyak di-rampas dan di-perkechilkan.

Hari ini mereka itu hanya mempunyai kuasa menguruskan perkara2 kecil sahaja.

Kita juga terlebih ma'alum bahawa "Adat Perpatih" itu merupakan Falsafah Hidup satu bangsa "Petani".

Maka sama ada Falsafah Hidup itu sesuai atau tidak untuk satu masyarakat yang hidup "Dalam zaman Perindustrian"—seperti zaman yang kita tempoh sekarang—tiadalah penyusun bermaksud membinchangkan-nya pula.